

կէրին էր հետապնդում, դիպչի նախ և առաջ երեխաներին: Պողպատի շախմատը փախցնում էր ֆաշկէրին երեխաների մոտից և այդպիսով նաև պաշտպանում վերջիններին կայծակնահար լինելուց:

Ազգագրագետների ուշադրությունը վաղուց գրավել է այն դիտողությունը, որ բոլոր ազգերի մեջ, որտեղ մետաղին հատկացվում էր մի հատուկ դորություն, նույն դորությունը չի վերագրվում պղնձին, մանավանդ կովկասյան ժողովուրդների մեջ, այլ միայն ու միայն երկաթին: Այդ իրողությունը պետք է բացատրել թվում է թե նրանով, որ երկաթը մարդկային աշխատանքի զարգացման ընթացքում ունեցել է շատ ավելի խորը, հեղափոխիչ և վճռական նշանակություն, և երկաթն ավելի քան թե պղինձը, բրոնզը աջակցել է աշխատանքային գործիքների և զենքի կատարելագործման և գործադրության թե՛ ընդարձակման և թե՛ բազմազանացման, ուստի այդ տեսակետով ավելի է ներշնչել մարդուն վստահություն կյանքի պայքարի մեջ և անկախ է դարձրել ֆաշկէրի միջամտությունից: Եթե ածուխի, աղի, հացի, մաղի հմայիչ դորությունը կարելի է շաղկապել տնտեսական և հասարակական զարգացման այս կամ այն փուլի հետ, պղնձին քաշկավան ուժ այժմ չհատկացնելն ավելի դժվար բացատրելի է այն պատճառով, որ հնագույն գերեզմանների մեջ հանդիպում ենք շատ նախնական ժամանակներից բրոնզե զարդեր՝ ապարանջաններ, մատանիներ, գոտիներ, որոնք անշուշտ հմայիլների՝ քլրսիմների նշանակություն ունեին և համարվում էին շար ոգիների քշող իրեր: Երկաթի գերիշխելուց հետո պղինձը կորցրել է այդ դորությունը:

Շատ ավելի դժվար է նույնպիսի գործնական բացատրություն գտնել խաչի գծագրությունը վերագրվող դորության համար: Զանգեզուրի հայր շատ հաճախ էր դիմել այդ դորության պաշտպանությանը, ոչ պակաս, քան այլ գավառների իր համազգայիները: Նա էլ խաչ էր քաշում խմորին, պանրին, աղին¹¹⁷, մսուրի մեջ ձիու համար կեր դրած գարու երեսին, ցորենը լցրած հորե գլխին կապում էին հասկերից խաչ միշտ միևնույն նպատակով, որ ֆաշկէրը չմոտենան, չփչացնեն խմորը, պանիրը և աղը (աղը չզրկեն աղիությունից), չհեծնեն ձիու մեջքին, չբրտնեցնեն նրան, չբորբոսեցնեն, չծաղկեցնեն, չգողանան հորի միջի ցորենը: Նույն նպատակով խոտի կամ հասկերի դեղը կամ խնձորի կույտը պատում էին խաչածե ձգած ձողերով: Խաչածե վարչամակ էին ձգում պատանված ննջեցյալի կրծքին, որ ֆաշկը չմոտենա: Որպեսզի գերեզմանում ֆաշկէրը չբնակվեն ննջեցյալից առաջ, նոր փորած գերեզմանի բերանին թիակներն ու բաճը դրվում էին խաչածե: Ննջեցյալին թաղելուց հետո հողաթմբի վրա խաչ էին գծում: Հորանջելիս բերանը խաչակնքում էին: Գիշերը ջուրը խմելիս Քրիստոսի անունը տալուց բացի, երեսն ու կուրծքը խաչակրնքում էին: Եթե մեկը քայլում էր կշեռքի, հրացանի կամ պառկած մարդու վրայով¹¹⁸ և այդպիսով կշեռքի, հրացանի, պառկած մարդու ուղղության հետ խաչ էր գծագրում՝ այդպիսի մեկին անմիջապես հարկադրում էին ետ քայլել, վերացնել խաչի նշանը, եթե ոչ՝ հացը կկտրվեր կամ կթանկանար, հրացանը չէր կրակի, կամ գնդակը նպատակից կվրիպեր, մարդը բոյ չէր քաշի, կամ կհիվանդանար: Խաչեկաթավ, նույնիսկ ոչ թե երկաթից, այլ փայտից շինած, պաշտպանում էին յէրթիկը, իհարկե ոչ պատահաբար այդ տեղով անցորդին անկումից պաշտպանելու համար, դրա համար խաչեկաթը շատ բարակ էր:

¹¹⁷ СМОМПК, вып. XIII, отд. I, стр. 112, 118, вып. XXXIV, отд. III, стр. 97.

¹¹⁸ СМОМПК, вып. XIII, отд. I, стр. 112, вып. XVII, отд. III, стр. 200.